



DEO OPTIMO MAX.

UNI ET TRINO,

VIRGINI DEIPARÆ, ET S. LUCÆ  
Orthodoxorum Medicorum Patrono.

QUÆSTIO MEDICA.

CARDINALITIIS DISPUTATIONIBUS  
*manè discutienda, in Scholis Medicorum, die Martis  
secundâ Aprilis, anni M. DCC. XLIII.*

M. ANTONIO-NICOLAO GUENAULT,  
Doctore Medico, Præside.

*An ut immodicus bebetat, sic moderatus acuit vini usus, ingenium?*

I.



NIHIUM omne naturæ inimicum. Verissima sanè, nulloque argu-  
mento infirmenda hygieines regula. Infelicem hanc morborum quibus  
quotidie affligimur cætervam à solo rerum non naturalium abusu sca-  
turire, meritò pronunciare ausim. Et certè morbi cujuscunque causam  
altius scrutare, aliquam semper tum cibi, tum potus aut aliorum id  
genus intemperantiam arguendam esse reperies. Sic ille pedes, genua  
manusque Arthritico dolore quasi dilaniatus, & teterrimo cruciatu rugiens, vel no-  
cturnorum studiorum, vel hibernarum per nives paludesque venationum, vel etiam  
effrænata veneris, vel tandem assiduarum computationum penas luit miserrimè. Sic  
quem tu olim infantem ingeniosas nugas lepidulè balbutientem tam sæpe miratus es,  
pubes jam factus, & inquietà indutus adolescentiâ, furem libidinem quoquomodò

ultrâ vires explendo, pinguioris tandem tardiorisque factus est Minerva. Sic denique ille choreis immoderatis, equitatione, pilâ, &c. exhaustâ spirituum penu, inevitabilium collapsu tandem fatiscit, aut spasmodicâ riget contractione. Infinitus siquidem si omnia quæ afferri possunt exempla enumerarem: satis sit dixisse nihil in naturâ esse corpori nostro tam amicum, quod non ipsi quoque immodico usu inimicum fieri queat. Inde panis ipsius assuetus, sed moderatus, usus optimus, *satietas verò pessima*; (a) inde etiam vinum, si inconditâ assidue quantitate ingeratur, ingenii tandem aciem obtundit & hebetat, si parvâ & honestâ, excitat & acuit.

Finge tibi tumultuosas ebriorum epulas, genialesque sapientum dapes: quàm immane utrimque discrimen! Hi mœstitiâ & curas, illi rationem iudiciumque imâ recondunt lagenâ. Hic amœna lætis vultibus insidet voluptas, gratus resonat cantilenarum concentus, is micanti cyathorum colori adverso lumine modestè inhians, Bacchum, iste amatoriâ eloquentiâ disertus, Venerem, celebrat, omnium denique oribus crepant lepidæ sale attico facetiæ. Illic personant omnia vocibus ebriorum, natant pavimenta vino, madent parietes, illi natis in usum lætitiæ cyphis pugnant, & barbaro Thracum more verecundum Bacchum, sanguineis vexant jurgiis, illi turpiter vomentes frustis esculentis vinum redolentibus gremium suum & totum implent conclave. At surgentes, & è mensâ recedentes utrosque convivas intueri, en ut ille tardo ac nimis irriguo gutture extremas tantùm vocum syllabas promiscuè cum vinosis ructibus expellit, viden alterum sinuoso tramite titubantem? Jam labantia vino genua ingloriorum corpus fulcire renuunt, tandem procumbit humi vir, nec illum coram omnibus crapulam pudet edormire. Quàm verò jucunda aliundè sese offerunt spectacula! Alii florentes hortorum xystos firmo & alacri pede spatiantur, alii ludis, choreis aliè exercentur: hæc omnia lætitiâ spirant, cuncta illic tristem infamiam redolent. O quàm diversas pro diversâ dosi liquor idem agit scenas!

(a) Hipp.

## I I.

INDE etiam fortasse accidit ut Mahumetana Religio vinum omne à Turcarum epulis tam iniquè removerit. At verò quanta inde effluerint incommoda satis superque innotescet, si totam Asiam aquatico potu miserè irriguam cum Europâ nostrâ honesto Baccho recreatâ conferamus. Illinc exulante vino, huc omnes ingenuas artes in terram nostram exulasse dixeris, ibique favente eodem vino fuisse propagatas. Hic adsunt homines studiis expoliti, morum urbanitate ingenique elegantia ubique conspicui, illic barbara gens, sine litteris, incultis moribus inconcinna, ac tandem cordis mentisque ferocitate Thracibus haud absimilis. Nec est quod objicias illos athleticæ corporis robore, firmâque sanitate vigere, non enim tam lætis humeris, tam robustis lacertis per omne periculum impunè viribus audaces, nisi vinum nostrum Opio suo mentirentur: inconcussum sanè vini necessitatis argumentum. Quo igitur fato, etiam apud nos bene multi, solis vini incommodis intenti, ac de ipsius utilitate parum solliciti, illud & à nostris mensis omnino arcendum arbitrantur? Nonne a triplex circa guttur habent, qui surdis faucibus aquam pariter & vinum excipientes, illam huic volunt esse præponendam?

## I I I.

QUID ergo liquori nostro tam immane exprobratis Abstemii iudices? Quorum tandem fevero tristisque supercilio floridam ac gemmis bene distinctam bibulorum faciem tam acerbè increpatis? Vinum immodicè haustum ingenium hebetat. Esto. At verò nonne & aquæ ipsius nimia potatio, laxatis ventriculi fibris, dige-

3

stiones depravat, ac inde adulteratis functionibus, mortem ipsam tandem portendit? Ne tamen crimen nostrum alterius crimine excusare videamur, meritas Vini laudes affero. Quid illo citius potentiùsque fractas labore vires exsuscitat? Vinum averfos amicos componit, novas amicitias comparat, junctas fovet, veteres conglutinat. Pauci vere Floram, nulli ætate Cererem, omnes autumnò Bacchum, celebrant, ac instantibus vindemiis passim exultantes, tam benefici succi natalitiis publico plausu gestunt acclamare. Ut autem omnia quæ à quæstione nostrâ videri possent aliena, omit- tam, ad argumentum propèro: Moderatus acuit vini usus ingenium. Dubitas? Li- tem ergo dirimat luculentus Bacchicæ disputationis arbiter Horatius. Sic ille Ampho- ram suam amicè compellat,

*Tu lene tormentum ingenio admoves  
Plerumquè duro: tu sapientium  
Curas, & arcanum jocosò  
Consilium regis Lyæo.*

Non igitur aded mirere si quem in remotis rupibus carmina docentem Bacchum viderat, hunc Poëtices Magistrum sibi ac Præceptorem elegerit. Qui Baccho potiùs quàm Phæbo plenum rapi se confessus est, Massico sæpiùs quàm Permessio liquore ebrius insanivit; & quidem non immeritò: non enim tam grandia cecinisset Vates Falerno pariter ac Parnassio colli amicus, nisi utriusque montis Deos incolas calenti cerebro consociasset. At ne quis inter homines ingeniù elegantia celebres Flaccum solum Vi- no devotum fuisse arbitretur. Viri olim sagacitate maximè illustres, ipsique morum gravitate commendatissimi, acerrimi quoque vini præcones extiterunt. Homerus Deo- rum & Heroùm commendatione in æternum conspicuus vini laudibus vinofus argui- tur, ac tandem, ut Virgilium, Ovidium, Plinium, & tot alios omittam,

*Narratur & prisçi Catonis  
Sape Mero caluisse virtus.*

## I V.

**V**ERUM ne perdoctos tot illustrium potatorum cineres movere videar impru- dens, prisçam patrum ætatem jam sileo, ac nostrum sæculum appello. Vos testor, Regiones optimo vino feraces, quæ tot litteratos in sinu vestro, quasi ad vitis um- bram, educatos, in gloriam vestram toties emisistis. Sacratum Mnemosines Limen ingredi liceat; venerandis affixa parietibus literariæ Reipublicæ Heroùm insignia evol- vamus: Quot emicant Burgundi Authores (a) Pampineâ corollâ non minùs quàm Phæbeâ lauro illustres. Ille (b) splendide stipatus Heroibus quos in scenam Drama- ticam totius Galliæ plausu tam grandia tonantes edidit, in patriæ suæ pariter ac sui ip- sius laudem elucescit. Alter (c) Cothurno æquè ac Socco decenter evinctus, nec Metro- maniacò minùs quàm Sueciæ Principe (d) clarus, Veneri etiam carmina laudescque poscenti arridere non dignatur. Ut brevis sim, cæteros taceo. Sed quid tu beni- gniam Campaniam nostram procaci dente insectaris? Quid de *nonaginta novem ovibus* insulsè musitas? Nonne suis etiam litteratis Viris (e) Campania gloriatur? Sed, ne Campanus Campanos fricare videar, fateor Provinciam hanc, etiamsi generoso vino commendandam, litterariam tamen Lauream alteri ultrò concedere, at inde magis ac

(a) Voyez la Bibliothèque de Bourgogne.

(b) M. Crébillon.

(c) M. Pyrrhon.

(d) Gullave, Tragédie de M. Pyrrhon.

(e) Il y a eu un assez grand nombre de gens de Lettres sortis de Champagne: entr'autres un excellent Poëte Latin appelé Nicolas Bourbon, il étoit de Langres, parmi ses Poësies on trouve la célèbre inscription de l'Atteual de Paris,

magis Theseos nostræ veritas evincetur, <sup>4</sup> si quidem nascitur tantum illud discrimen à dispari vini utriusque naturâ. Illud, nempe Burgundum, sat magnâ tartari quantitate abundans, propter irretitos terræ illâ substantiâ, ac inde difficilius explicabiles spiritus, tutiori ac diuturniori potitur effectû. In altero tartarum ferè nullum est, adeoque spiritus omni ferè alieno commercio expediti, jamjam antè avolarunt, quàm ad cerebrum potuerint appellere, aut si illuc attolluntur, præ nimia suâ volatilitate, tam citò dissipantur, ut integrum suum effectum nequeant exerere, nec aliam excitent, nisi vividam, sed brevem mentis hilaritatem, nec ultrâ convivi spatium vulgò duraturam: unde fit etiam ut nimia vini istius potatio ferè nullam, aut saltem levem tantum ebrietatem concitet.

## V.

UT autem hæc omnia clariùs pateant, Vini naturam & generales effectus Physicè exploremus. Vinum est succus uvarum fermentatus, sive mustum fermentatione immutatum. Si salia quæ in multo ante fermentationem multo oleo erant intricata, nativâ suâ volatilitate fractis, divisis ac dissociatis oleosis partibus quibus irretiebantur, è suis compedibus tandem evoluta, subtilissimis ac summè mobilibus quibus horrescunt spiculis, eas in spiritus immutent, vinum habes triplici constans partium genere: spirituosus nempe, quæ ex salium & oleorum lucâ oriuntur, aqueis, quæ priores temperant, ac tandem terreis, quæ aut internis dolii parietibus quibus concreverunt, & tartarum nuncupantur, aut sub sæcurn nomine ad fundum subsident. His positis vini effectus facili operâ possunt explicari. Vini immodicè sumpti partes spirituosæ volatilitate suâ ad cerebrum magnâ copiâ evectæ, violento illic ac incondito motu abripiuntur, & delirium procreant. Venterculus aliundè vini redundantia turgidus, vinosæ materiæ extrusionem continuo nixu molitur, indeque vomitus. At supradictæ illæ partes spirituosæ ad cerebrum nequeunt tantâ quantitate attolli, quin tandem nonnullas secum evehant phlegmatis particulas, quæ exilissimis spirituum animalium officinæ vasculis agglutinatæ, eorumdem spirituum fabricam motumve perturbent ac deleant, unde functionum quarumlibet à cerebro dependentium serena, somnus. Nec aliter succedit veterosâ illa ebriorum mentis hebetudo; rectèque dici potest continuata somnolentia à repetitâ supradictarum causarum actione oriunda. Si verò moderato vini haustu ventriculus tantum incaleat, spirituosæ particule nullâ aquosarum partium miscelâ infectæ sanguini admiscantur, vim & robur cuilibet parti conciliant, ac per inflexos Emporii Meandros libero, sed pacato motu divagantes, expedito spirituum animalium circulo, acutos illos colloqui sales, ac honestam mentis hilaritatem pariunt. Nè quis ergò miretur si illi eadem ut ita dicam cote ingenium acuant, quâ alii illud corrodunt & hebetant; imò nobiscum æquo animo fateatur,

*Ergò ut immodicus hebetat, sic moderatus acuit vini usus, ingenium.*

Proponebat Parisiis, JOSEPHUS LALLEMANT, Lingonæus,  
Saluberrimæ Facultatis Medicinæ Parisiensis Baccalaureus, A. R. S. H. 1743,  
à sextâ ad meridiem.

---

Typis QUILLAU, Universitatis & Facultatis Medicinæ  
Typographi, 1743.